

**Ekonomi Malaysia Berkembang 4.7 Peratus Pada Suku Pertama 2012**  
**Bernama**  
**23 Mei, 2012**

KUALA LUMPUR, 23 Mei (Bernama) -- Pertumbuhan Keluaran Dalam Negara Kasar (KDNK) Malaysia berkembang 4.7 peratus pada suku pertama 2012 berbanding 5.1 peratus dalam suku yang sama 2011 dan 5.2 peratus dalam suku keempat.

Gabenor Bank Negara Malaysia Tan Sri Dr Zeti Akhtar Aziz berkata permintaan domestik kekal teguh, disokong oleh aktiviti ekonomi dalam kedua-dua sektor swasta dan awam sementara eksport menyederhana di celah-celah permintaan luaran yang lemah.

"Suku pertama pada kebiasaannya menunjukkan pertumbuhan yang negatif.

"Ia selalunya rendah berbanding suku keempat, yang sebenarnya suku paling tinggi," kata beliau dalam persidangan akhbar mengenai prestasi ekonomi negara di sini.

Beliau berkata berdasarkan kepada andaian semasa, negara akan mencapai pertumbuhan 4.0-5.0 peratus tahun ini.

"Ia masih kekal dalam lingkungan itu. Jika keadaan semakin teruk, ia akan hampir kepada empat peratus. Sekiranya keadaan semasa biasa, ia berada dalam pertengahan kepada lingkungan itu dan sekiranya ia betul, maka, ia akan hampir ke lima peratus.

"Ini sudah tentunya berdasarkan kepada andaian yang tiada berlakunya keruntuhan mutlak di zon euro dan kami percaya yang komuniti antarabangsa, khususnya para pemimpin di negara-negara zon euro, akan terus menyediakan penyelesaian bagi mengatasi masalah semasa," kata beliau.

Mengulas dengan lebih lanjut mengenai suku pertama, Zeti berkata permintaan domestik kekal berdaya tahan, meningkat 9.6 peratus (4Q11: 10.4 peratus), sementara pertumbuhan penggunaan persendirian terus kukuh pada 7.4 peratus (4Q11: 7.3 peratus).

Di bahagian penawaran, pertumbuhan dalam kebanyakan sektor ekonomi utama terus sederhana. Ini disebabkan oleh pertumbuhan yang lebih sederhana dalam aktiviti yang berorientasikan eksport telah lebih daripada mengimbangi pertumbuhan yang mampan dalam aktiviti berorientasikan dalam negeri.

Pertumbuhan dalam sektor perkhidmatan dan perkilangan terus menjadi sederhana pada suku pertama, mencerminkan pertumbuhan yang lebih sederhana dalam aktiviti berkaitan perdagangan serta pertumbuhan yang berterusan dalam aktiviti berkaitan dalam negeri.

Pertumbuhan dalam sektor pembinaan bertambah kukuh, disokong oleh pelaksanaan projek-projek kejuruteraan awam dan pembangunan projek kediaman.

Sektor pertanian menjadi sederhana disebabkan oleh pengeluaran minyak sawit mentah dan getah yang lebih perlahan, manakala pengeluaran sektor perlombongan berubah arah untuk mencatat pertumbuhan yang kecil.

Dalam sektor luaran, lebihan akaun semasa lebih rendah pada suku pertama tetapi jumlahnya kekal besar pada RM18.1 bilion, bersamaan dengan 8.4 peratus daripada pendapatan negara kasar.

Ringgit menambah nilai sebanyak 3.6 peratus berbanding dengan dolar US dalam suku pertama, sejajar dengan trend mata wang serantau yang lain.

Kestabilan kewangan kekal kukuh sepanjang suku pertama 2012, disokong oleh institusi kewangan yang teguh dan keadaan pasaran kewangan yang terurus.

Bergerak ke hadapan, krisis hutang kerajaan di Eropah masih memberikan risiko kepada ekonomi global.

"Harga minyak yang tinggi secara berterusan, yang didorong terutamanya oleh ketegangan geopolitik, menambah lagi ketidakpastian dalam persekitaran global," kata Zeti.

Bagaimanapun, pemulihan yang berterusan secara beransur-ansur di AS dijangka mencerahkan lagi prospek pertumbuhan global.

Bagi Asia, walaupun kegiatan ekonomi mungkin terjejas oleh perkembangan luaran, pertumbuhan dijangka terus disokong oleh asas-asas ekonomi makro dalam negeri yang kukuh serta dasar yang fleksibel.

Bagi ekonomi Malaysia, meskipun persekitaran luaran yang mencabar masih memberikan risiko kepada prospek pertumbuhan ekonomi Malaysia, permintaan dalam negeri dijangka kekal berdaya tahan.

"Perbelanjaan sektor swasta yang terus meningkat, dan disokong pula oleh perbelanjaan sektor awam, dijangka dapat menyokong prestasi pertumbuhan secara keseluruhan," kata Zeti.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=668159>